

SEKUÊNSIA BALUN BA AKORDU 5 MAIU 1999.

Istória Pasadu tuir Relatóriu Chega! – Nasoens Unidas entrega proposta ho kontiúdu planu autonomia iha fulan Fevereiro 1999, ho naran SARET (Special Autonomous Region of East Timor). Indonézia mak sei kontrola nafatin asuntu negosiu estranjeiru, moeda, defeza no finansa, enkuantu Konsellu Rejionál Timorense sei assume poder ne'ebé luan ba lejislativu, no kontrola polísia no sistema judisiál. Militar Indonézia (TNI) sei uza de'it ba defeza externa, alende ne'e sei koloka de'it iha kuartél sira.

Iha fulan Marsu, Indonézia anúnsia votasaun sifrajiu direta. Indonézia hakarak atu akordu ne'e la bele atu irrecusável no definitiva. Votasaun ne'e sei bolu nudár 'Konsulta Populár, no lakohi atu bolu ho liafuan referendu, ne'ebé indiretamente implika ba autodeterminasaun no eskolla soberania ba povu Timoroan, ne'ebé tuir Indonézia akontese ona liu husi petisiaun governu provizoriu iha tinan 1976, kona-ba integrasaun no Lei nº. 7 tinan 1976, kona-ba integrasaun Timor-Leste ba Indonézia nudár provinsia ba dala – 27.

Ho degredasaun situasaun seguransa ba diálogu ne'ebé patrisinu husi Nasoens Unidas entre Portugal no Indonézia iha loran 22 Abril debate kestaun seguransa balun atu dezarma milisia, redúz efetivu militar Indonézia no akontanamentu membru FALINTIL, no kriasaun polísi sivil. Maibé Ministru Negosiu Estranjeiru Indonézia Ali Alatas rekuza atu aprova planu espesífiku sira. Tantu Estadu Unidus Amerika, nune'e mós Australia fó konsellu ba Representante Espesiál Sekretáriu Jerál Jamsheed Marker atu la kria perigu ba negosiasaun hodi fó presan ne'ebé boot liu ba seguransa.

Ho nune'e, iha loran 5 Maiu 1999, Indonézia no Portugal asina akordu balun kona-ba implementasaun konsulta populár. Indonézia pretende atu iha ona rezultadu antes Reuniaun MPR iha fulan Setembru, nune'e sira bele ratifika tuir lejislasaun Indonézia nian. Data ne'ebé aprova mak 8 Agostu. Data ida ne'e hatudu kalendáriu ne'ebé aberta no oportunidade ne'ebé limitadu. Liafuan sira ne'ebé aprova ba votasaun mak husu ba Povu Timor-Leste atu aseita ka rejeita autonomia espesiál ne'ebé oferese ba Timor-Leste iha Estadu Unitáriu Repúblika Indonézia. Akordu sira ne'e subliña realizasaun "Votasaun ida ne'ebé direta, sekreta no universál" (artigo 1), no katak "responsabilidade Governu Indonézia atu mantein paz no seguransa iha Timor-Leste iha forma garante konsulta populár ne'e realiza iha forma ida ne'ebé livre husi intimidasaun, violénsia ka intervensaun husi parte rua". (artigo 3). Sira mós halo definisaun periodu tranzisaun ida hafoin konsulta populár, ho prezensa adekuaudu husi Nasoens Unidas iha Timor-Leste. Diretiva husi SARET hanesan parte ida husi akordu ne'e, no Nasoens Unidas mak responsabiliza atu hala'o kampaña informasaun ba públiku no divulgasaun. Tantu Indonézia, ou Portugal proibidu halo kampaña ba opsan saida de'it.





MEDIDA SEGURANSA IHA AKORDU 5 MAIU.

Akordu 5 Maiu 1999 la konsege define maneira responsabilidade seguranse ne'ebé adekuaadu. Polísia Indonézia formalmente hetan responsabilidade ba seguranse. Polísia foin separa husi forsa militár, no sei hela nafatin iha supervizaun Komandu Jenerál Wiranto, ne'ebé hanesan Ministru Defesa. Akordu ne'e destaka elementu polísia sivíl internasionál dezarmadu na'in 300 atu apoia ekipa eleitorál ONU nian, hafoin númeru ne'e aumenta tan ho ofisiál ligasaun militár na'in 50, ne'ebé konsidera merese liu ho kapasidade atu iha ligasaun ho militár Indonézia.

Akordu ne'e ezije "neutralidade absoluta husi TNI", maibé failla atu obriga TNI redúz númeru efetivu ou halo dezarmamentu. Sira ho vervalmente hateten, KPS ne'ebé foin forma mak responsabiliza ba dezarmamentu. José Ramos Horta konsiente katak, defisiensia ba medida seguranse, mak nia la marka prezensa iha asina akordu ne'e. Ramos Horta antes ne'e fó ona atensaun ba ONU, liu husi surat ida ba Kofi Annan katak, Timor-Leste la sente seguru "ho protesau ne'ebé fó husi militár ne'ebé hanesan no grupu kriminozu ne'ebé transforma nasaun ne'e sai ona hanesan infernu ida". ONU lakosiente ho perigu husi medida seguranse, no Sekretariu Jerál hakerek ba Indonézia hodi hato'o kona-ba preokupasaun no lamentasaun balun. Nia monstra dispostu atu kansela votasaun ne'e, karik kondisaun seguranse la di'ak. Maibé karta ne'e la ofisiál no nia kondisaun sira laaprova husi Indonézia. Entaun, kestaun ne'e mak halo fraku pozisaun ONU durante prosesu ne'e. Ian Martin, Representante Espesiál Sekretáriu Jeral ONU tuir mai hakerek katak maske ho dispozitivu seguranse ne'ebé forte liu mós ONU sei hasoru dilema ne'ebé sei mosu: sei kontinua ka lae iha kondisaun seguranse sira ne'ebé ho klaru viola akordu Indonézia.

Iha loron 5 Maiu 1999, Vise Xefe Estadu Maiór Exérsitu Tenente Jenerál Johny Lumintang haruka telegrama ba Komandu Rejionál Militár Bali (Kodam IX Udayana) husu hodi halo preparasaun planu mai Timor-Leste. Ida ne'e hamosu elaborasaun planu ba parte polísia no militár hafoin votasaun, hanesan halo evakuasaun ba baluk-ida-haat husi populasaun Timor-Leste. Planu ida nee komprova antipatia Militár Indonézia ba autór sosiedade sivíl oi-oin, inklui lider rezisténsia no estudante universitáriu sira, igreja, observadór internasionál no ONU, ne'ebé klaru katak kontrariu ho netralidade ne'ebé ezije iha Akordu 5 Maiu. Tantu Polísia no TNI la informa ba ONU kona-ba elaborasaun planu ida ne'e to'o momentu ikus ona atu realiza votasaun.

Entretantu iha loron ne'ebé hanesan, Milisia Besi Merah Putih (BMP) tuir relatóriu oho ema balun ne'ebé sira detein. Iha loron 5 Maiu 1999, membru BMP oho mane na'in rua ho naran Antonio no Rosario besik sira nia postu iha Aldeia Ediri, Suku Vatuvou, Postu Administrativu Maubara, Munisipiu Liquiça.

